

大寶積經

第五卷

八十三
文五

47613

元祿九年丙子二月日重脩

皇圖聖圖 帝階級呂

佛日增輝 轉輪常轉

山城州天安寺法金剛院置

藏



大寶積經卷第一百五

文

隋沙門達摩笈多 譯

善任意天子會第三十六之四

破二乘相品第七之二



爾時善任意天子讚文殊師利言善哉善哉
大士仁今真是聰辯利智使說如斯甚深空
忍文殊師利言天子我非如是聰辯利智夫
利智者則是一切嬰兒凡夫何以故天子一
切凡夫是名利智何等利智所謂地獄利智
畜生利智餓鬼利智閻摩利智乃至三界一
切利智如是取著相應得言利智所以者何
不知生死煩惱先際故天子是故彼諸凡夫

著貪欲利者瞋恚利者愚癡利乃至與彼諸
見名色取著相應故言利智非謂諸佛世尊
及聲聞緣覺得忍菩薩有斯利智是乃名爲
一切凡夫取相利智也於是善住意天子復
問文殊師利言大士仁今所說欲顯智耶文
殊師利言不也善住意言欲隨行耶文殊師
利言不也善住意言欲隨句耶文殊師利言
如是如是天子我由字句善住意言大士仁
今何故如斯說耶文殊師利言天子若諸菩
薩於一字一句初不移動然彼字句義門處
所近遠淺深皆如實知謂知空處知無相處
知無願處知遠離處知無所有處知無生處

知如如處而於其間無受無作無解無知是
故得言唯字句耳爾時世尊讚文殊師利言
善哉善哉文殊師利汝今已得陀羅尼故乃
能如是分別說也文殊師利白佛言世尊我
實不得彼陀羅尼何以故世尊若有得是陀
羅尼者斯則名為愚癡凡夫非佛世尊及諸
菩薩得陀羅尼所以者何世尊彼諸凡夫癡
衆生等有取著故得陀羅尼取著何等所謂
取著我故得陀羅尼取著人故得陀羅尼取
著壽命故得陀羅尼取著丈夫故得陀羅尼
取著斷滅故得陀羅尼取著常恒故得陀羅
尼取著貪欲故得陀羅尼取著瞋恚故得陀

羅尼取者愚癡故得陀羅尼取者無明故得
陀羅尼取者有愛故得陀羅尼取者身見故
得陀羅尼取者五陰故得陀羅尼取者十二
入故得陀羅尼取者十八界故得陀羅尼取
者憶念故得陀羅尼取者分別故得陀羅尼
取者六十二見故得陀羅尼如是乃至取者
一切諸行故得陀羅尼是故凡夫得陀羅尼
所以者何若法爲彼愚癡取者是則凡夫所
得非謂佛得非聲聞得非辟支佛得非菩薩
得以是義故唯彼凡夫得陀羅尼何以故彼
諸凡夫以愚癡故言有取得非佛世尊及菩
薩等爾時善任意天子復白文殊師利言大

士仁若不得陀羅尼者將無墮彼頑鈍位乎
文殊師利言如是天子我真頑鈍何以故夫
頑鈍者謂無所知我所行處不可知故是故
一切諸佛世尊及諸聲聞緣覺菩薩皆墮頑
鈍非諸凡夫所以者何一切凡夫在於數中
諸餘智人盡入頑鈍如須陀洹障礙行故貪
欲心行尚墮數中何況愚癡諸凡夫等非
數也天子是故得言我為頑鈍我實不得彼
陀羅尼何以故乃至一法我無所得故說是
法時彼大眾中有五百比丘聞此法門不能
信受生大恐怖起誹謗心發惡心已棄捨而
去即自見身墮大地獄爾時尊者舍利弗白

文殊師利言大士仁今且住勿說如此甚深
經典所以者何今此會中五百比丘聞此法
門不能信受生大怖畏起誹謗心即自見身
已處地獄文殊師利語舍利弗言舍利弗汝
今不當妄起分別何以故乃至無有一法墮
地獄者所以者何一切諸法無所生故汝今
云何忽發斯言令我休止勿宣是法舍利弗
若善男子善女人依止我見依止人見依眾
生見依壽者見依諸見已雖復供養恒沙如
來應供正遍覺及比丘僧一切眾具隨須奉
給如是供養盡其形壽無有休廢若復有人
聞我所說甚深法門一切世間所不能信謂

空無相無願無作寬大寂靜無生無滅無我
無人無衆生無壽命無常苦無我如是諸法
聞已誹謗墮於地獄然舍利弗即此善男子
善女人得聞如是甚深法已雖墮地獄從地
獄出速得涅槃若善男子善女人雖復供養
恒沙數如來應供正遍覺以取著我不聞如
是甚深經法終不解脫速證涅槃爾時世尊
讚文殊師利言善哉善哉文殊師利如是如
是誠如汝言若有得聞如是甚深微妙經典
與值佛出世等無有異何以故若有欲證須
陀洹果要由此經欲證斯陀舍欲證阿那舍
及阿羅漢要聞此經所以者何以不著我乃

能證法證此法時無有所見無所得故爾時
世尊告尊者舍利弗言舍利弗汝當知此五
百比丘雖墮地獄後從獄出速證涅槃非彼
愚癡凡夫之人沒於見得隨墜疑心供養如來
能得解脫舍利弗是諸比丘還復因此乃至解
脫速得涅槃非是餘人能速解脫所以者何以
不聞此深法門故舍利弗若有善男子善女人
得聞如是甚深法門一經於耳雖不信受墮於
地獄然速解脫其有隨見入地獄者未能解脫
破凡夫相品第八

爾時善住意天子復白文殊師利言大士仁
今許我修梵行乎文殊師利言如是天子汝

今若能不念作求不思進趣如是吾將許汝
梵行善住意言大士以何義故如斯說耶文
殊師利言天子若有為作可名梵行若無為
作何名梵行又復天子若有見得可名梵行
若無見得何名梵行善住意言大士仁今寧
當無梵行耶文殊師利言如是如是天子我
無梵行所以者何夫梵行者則非梵行非梵
行故我名梵行時善住意天子讚文殊師利
言善哉善哉大士仁以具足樂說辯才能作
如是無障礙說文殊師利言天子若吾具足
無礙辯者即成障礙何以故凡是取著我及
我所皆由分別一切分別無非障礙故爾時

文殊師利復語善住意天子言天子汝今若能斷除一切衆生命根然不執刀不持杖不把棊不捉塊而行事者吾當同汝修於梵行善住意言大士復以何義如斯說耶文殊師利言天子言衆生者於意云何善住意言大士我言衆生衆生者乃至一切但有名字皆想取故文殊師利言天子是故我言汝今當須殺害我想殺害人想殺衆生想殺壽命想乃至滅除名字等想如斯殺也善住意言大士當以何殺具而行殺乎文殊師利言天子吾常用彼利智慧刀而行殺害當行殺時彼利智刀應如是執當如是害然亦無有執持

之想及以害想天子以是義故汝當善知殺
害我想及衆生想是名真殺一切衆生如是
吾當許汝梵行爾時文殊師利復語善住意
天子言天子我復語汝汝若修行十惡業道
復能成就黑濁垢法放捐一切十善業道破
壞離散清白法者我當共汝修於梵行善住
意言大士以何義故復如是說文殊師利言
天子所有一切染濁清白皆悉平等彼平等
者我得如此同汝梵行天子於意云何汝以
何法爲染濁平等善住意言以不貪不作不
退不墮是謂染濁平等文殊師利言天子復
以何法爲白淨平等善住意言以如法性及

與實際三解脫門是謂白淨平等文殊師利
言天子吾即令汝真法界中具足修行周旋
往返其事可乎善任意言不也大士文殊師
利言天子以是義故我作斯說染濁清白一
切等者然後方可共修梵行爾時文殊師利
復語善任意天子言天子汝今若能取應死
人手執利刀斬其頭者吾當許汝如是梵行
善任意言大士以何義故復作此說文殊師
利言天子可殺者誰何者是頭誰能行殺天
子汝今當知須殺貪欲須殺瞋恚須殺愚癡
如是乃至我慢嫉妬欺誑曲執著取相及
受想等天子是為可殺天子若人一心專精

自守貪欲心發即應覺知方便散除還令寂
靜云何散除應作是念此是空此不淨求此
欲心生處滅處從何所來去至何所是中誰
染誰受染者誰為染法如是觀時不見能染
不見所染不見染事以不見故則無有取以
不取故則無有捨以不捨故則無有受不捨
不受則名離欲寂滅涅槃如是乃至一切受
心亦如是說天子當知如是殺法即殺即生
是故得言彼行殺時先斬其頭是為真殺以
是義故我如此說爾時文殊師利復語善住
意天子言天子汝今若能違背諸佛毀謗法
僧吾將同汝如是梵行善住意言大士仁今

何故復如是說文殊師利言天子如汝意者
以何為佛善任意言大士如如法界我言是
佛文殊師利言天子於意云何如如法界可
深著乎善任意言不也大士文殊師利言天
子以是義故我如是說汝今若能毀謗諸佛
吾將同汝如是梵行文殊師利言天子如汝
意者以何為法善任意言大士離欲寂靜我
名為法文殊師利言天子於意云何彼寂靜
法可深著乎善任意言不也大士文殊師利
言如是天子以此義故我如是說汝今若能
毀謗正法吾將同汝如是梵行文殊師利言
天子如汝意者以何為僧善任意言大士無

為法者是名聖僧如世尊說一切聖人以無
為得名故無為法名聲聞僧文殊師利言天
子於意云何是無為法可執著乎善任意言
不也大士文殊師利言如是天子以此義故
我如是說汝今若能破壞聖僧吾將同汝如
是梵行文殊師利言天子若人見佛彼則著
佛若人見法彼則著法若人見僧彼為著僧
何以故以佛法僧非可得故天子若人不見
佛不聞法不識僧者彼為不背佛不謗法不
破僧何以故以其不得佛法僧故天子若人
愛佛愛法愛僧彼為深著佛法及僧天子當
知若人不著佛法僧者是則名為離欲寂滅

天子以此義故我如是說汝今若能於佛法
僧不染著者我則同汝如是梵行爾時善任
意天子復白文殊師利言大士希有希有今
日乃能宣說如是甚深義處我於大士以何
報恩文殊師利言天子汝莫報恩善任意言
大士我今去何得不報也文殊師利言天子
汝莫報恩所以者何天子汝能如是不報恩
者即爲報也善任意言大士仁今寧可無報
恩乎文殊師利言天子如是如是我不能報恩
亦非不報善任意言大士仁以何義更作是
說文殊師利言天子凡愚之人造種種法起
種種見行種種行以作如是種種見行是故

念言我當報恩天子此非正行善男子也其
有正行善男子者乃至無有少作或作不作
彼終不言我念報恩又復天子不報恩者如
佛世尊宣說平等謂一切法悉無所作無有
作處皆入平等無有轉還亦無超越非自非
他無作不作是故我為無報恩也尔時善住
意天子復白文殊師利言大士仁住何處作
如是說住忍說乎住法說也文殊師利言天
子我所住者非忍非法善住意言大士實住
何處故如是說文殊師利言天子我無所住
如化人身我如是住善住意言大士彼化人
者復依何住文殊師利言天子如如如住化

如是住天子若如是者汝去何言住在何處
爲忍爲法如斯問也天子是故我所言忍但
有其名名無住處法亦如是無有住處無有
動轉亦無分別天子當知一切諸法悉無住
處而言住者是謂如來爲諸衆生作如是說
所以者何如佛所說如來住彼如如法中一
切衆生亦復如是住於如如初不移動如衆
生如即如來如如來如即衆生如衆生如來
無二無別尔時善住意天子復白文殊師利
言大士所言沙門那沙門那者義何謂也文
殊師利言天子若非沙門非婆羅門是則名
爲真沙門也所以者何以彼不著欲界不著

色界不著無色界是故我言真沙門也天子
若眼不漏耳不漏鼻不漏舌不漏身不漏意
不漏者我復說爲真沙門也天子若不依止
說不依止證不依止處者我復說爲真沙門
也天子若無去處無來處無傷無瘡者我復
說爲真沙門也天子是以彼句非沙門非婆
羅門我乃說爲真沙門也余時善任意天子
讚文殊師利言善哉善哉大士實未曾有仁
者志若金剛其所宣說無有章句亦無處所
心感了達無所遺餘文殊師利言天子我心
不剛所以者何吾自放意心安柔忍是故不
剛善任意言大士是義云何文殊師利言天

子吾以恣心入聲聞地處緣覺境是謂放心
吾又恣心入諸塵勞生死之內而亦不惡貪恚
癡等煩惱過患是謂放心時善任意天子復
讚文殊師利言善哉善哉希有大士仁由過
去久供諸佛殖衆德本故能宣說妙若斯也
文殊師利言天子吾無供佛不殖善根所以
者何吾初不見宿昔所更又亦不知當來所
作雖有所作亦無有作於諸佛法未曾建立
云何能有殖衆德本

神通證說品第九

爾時善任意天子復白文殊師利言大士我
昔曾聞如幻三昧唯願垂慈顯此正受文殊

師利言天子汝欲見聞如幻三昧甚深境界
乎善任意言大士我誠願見時文殊師利如
言即入如幻三昧應時十方如恒沙等諸佛
國土一切境界自然現前於是善任意天子
悉見東方恒沙佛土其中所有種種衆事或
見比丘稱揚宣說如是經典或見比丘居像
或見優婆塞優婆夷像或見大梵天王天帝
釋四天大王或見人間轉輪聖王或見一切
天龍夜叉乾闥婆阿脩羅迦樓羅緊那羅摩
睺羅伽乃至或見一切鳥獸種類若干形貌
好醜皆為說法如此東方南西北方四維上
下一切十方咸有如是恒河沙等諸佛國土

所有事業亦皆如是等無有異盡是文殊師
利威神力也時善住意天子既見如是十方
佛土一切境界歡喜踊躍不能自持於是文
殊師利從三昧起善住意天子一心敬仰白
文殊師利言大士向見十方諸佛國土無量
境界佛事亦殊而各宣說如斯經典今時文
殊師利問善住意天子言天子於意云何汝
向所見東方所有一切境界可謂實乎善住
意言不也大士文殊師利言如此東方及餘
九方如是十方所有境界復爲實乎善住意
言大士一切皆虛無有實也所以者何一切
諸法本無有生其猶幻化欺誑世間一切諸

法轉變推移無常存者皆是虛妄顯現所爲
窮其躰實了不可得不作不生不起不滅於
是文殊師利讚善住意言善哉善哉天子誠
如汝言今時會中有五百菩薩已得四禪成
就五通然是菩薩依禪坐起雖未得法忍亦
不誹謗時諸菩薩宿命通故自見往昔所行
惡業或殺父殺母殺阿羅漢或毀佛寺破塔
壞僧彼等明見如是餘業深生憂悔常不離
心於甚深法不能證入我心分別彼罪未忘
是故不能獲深法忍今時世尊爲欲除彼五
百菩薩分別心故即以威神覺悟文殊師利
文殊師利承佛神力從座而起整理衣服偏

袒右膊手執利劍直趣世尊欲行逆害時佛
遽告文殊師利言汝任汝任不應造逆勿得
害我我必被害為善被害何以故文殊師利
從本已來無我無人無有丈夫但是內心見
有我人內心起時彼已害我即名為害時諸
菩薩聞佛說已咸作是念一切諸法悉如幻
化是中無我無人無衆生無壽命無丈夫無
摩奴闍無摩那婆無父無母無阿羅漢無佛
無法無僧無有是逆無作逆者豈有墮逆所
以者何今此文殊師利聰明聖達智慧超倫
諸佛出世尊稱讚此等已得無礙甚深法忍已
曾供養無量百千億那由他諸佛世尊於諸

佛法巧分別知能說如是真實之法於諸如
來等念恭敬而忽提劍欲逼如來世尊遽告
且住且住文殊師利汝無害我若必害者應
當善害所以者何是中若有一法和合集聚
決定成就得名為佛名法名僧名父名母名
阿羅漢定可取者則不應盡然而今此一切
諸法無體無實非有非真虛妄顛倒空如幻
化是故於中無人得罪無罪可得誰為殺者
而復受殃彼諸菩薩如是觀察明了知已即
時獲得無生法忍歡喜踊躍身昇虛空高七
多羅樹以偈嘆曰
諸法如幻化 斯由分別起 是中無所有

一切法皆空
計念我昔愆
殺父母良田
以彼惡業故
聞法悔惑除
我已覺法界
善知我等意
何處有諸佛
阿羅漢空寂
如幻無所生
深達法源底
如劍佛亦爾

顛倒虛妄想
所作業中甚
殺羅漢比丘
我當受大苦
大名拔我毒
衆惡無所有
方便度衆生
法僧亦復然
是處無有殺
諸法性如是
自手握利劍
一相無有二

愚癡取我心
過去爲大逆
是爲極重惡
沒疑網衆生
破散我疑心
諸佛巧方便
爲解諸疑縛
父母本自無
云何有業果
文殊大智人
馳逼如來身
無相無所生

是中云何殺

說此執劔妙法門時十方如恒沙等諸佛世界六種震動時彼十方諸佛世界一切諸佛現前說法彼佛侍者各於本國大眾會中從座而起咸請其佛言世尊今此神變是誰威德而今世間大地震動時十方諸佛各各告其弟子曰諸善男子今有世界名曰娑婆彼土有佛号釋迦牟尼如來應供正遍覺現在說法然彼世界有一上首菩薩摩訶薩名文殊師利久已不退於阿耨多羅三藐三菩提為欲破壞新學菩薩執著心故躬秉利劔馳走趣彼釋迦如來顯發深法以是因緣故令

大地如是震動彼佛世尊因智劍故說甚深
法復令無量無邊阿僧祇衆生法眼清淨心
得解脫證深法忍安住菩提爾時世尊建立
如是大神變時以方便力令彼衆中一切諸
來新學菩薩善根微少未離分別取相衆生
皆悉不覩彼執劍事亦不得聞其所說法爾
時尊者舍利弗白文殊師利言大士仁今日
造極猛惡業欲害如是天人大師是業若熟
當於何受時文殊師利告舍利弗言如是大
德如汝所說我今唯能造作如是極重惡業
而實不知於何處受然舍利弗如吾見者當
若化人幻業熟時我如斯受所以者何彼幻

化人無心分別無有念想一切諸法皆幻化
故又舍利弗我今問汝隨汝意答於意去何
如汝意者實見劍耶舍利弗言不也文殊師
利曰又定見彼惡業可得耶舍利弗言不也
文殊師利曰又定見彼受果報耶舍利弗言
不也文殊師利言如是舍利弗彼劍既無復
無業報誰造斯業誰受報者而反問我受報
處乎舍利弗言大士以何義故復如是說文
殊師利言如我所見實無有法業報孰者所
以者何一切諸法無業無報無業報孰故尔
時十方世界諸來菩薩摩訶薩等同請佛言
世尊唯願世尊以威德力加是文殊師利令

至十方諸佛世界說如斯法令彼衆生咸得
聽聞如我無異於是文殊師利菩薩摩訶薩
語彼十方諸菩薩言諸善男子汝今宜各一
心觀察自佛世界也時彼十方諸菩薩衆從
文殊師利聞是語已即各觀本自佛世界皆
覩文殊師利處其佛前爲諸大衆說如斯法
復各見彼皆有善任意天子問是法門又各
見彼十方佛國諸菩薩等悉皆大集又皆見
彼諸天子衆其數多少與此弗殊又各見彼
佛界清淨莊嚴微妙與此無異彼諸菩薩摩
訶薩衆如是見已生殊特心得未曾有同聲
讚言甚奇甚特今此文殊師利道德巍巍處

斯世界安住不動而能普現十方佛前。今時
文殊師利告彼十方菩薩衆言：諸善男子，汝
今當聽。譬如幻師既善學已，不離本座而能
幻作種種色像。菩薩摩訶薩亦復如是，既能
善學般若波羅蜜如幻法，即於一切如幻
法中隨其十方諸佛國土，欲現形像作諸佛
事如意，即能所以者，何一切諸法皆如幻化。
以是義故，所作隨心。譬如日月宮輪住虛空
處，初不曾下入諸器中，其光普照靡不周遍。
菩薩如是安住不動，隨心普現十方佛前，或
現聲聞緣覺等身，或現梵王帝釋等像，或現
四天轉輪王事，或現國主大臣政化，如是乃

至示現一切惡趣衆生形類隨意即能而亦
初無興作之想

稱讚付法品第十

尔時世尊告文殊師利言文殊師利若有得
聞此修多羅甚深法門與值佛興世等無有
異文殊師利若聞此經與證須陁洹無異與
證斯陁含無異與證阿那含無異與證阿羅
漢無異何以故以彼如如無異故文殊師利
又若聞此經心生信解與彼後身菩薩菩提
樹下坐於道場必成正覺一等無異何以故
如斯法門即是三世諸佛世尊之要道故於
是文殊師利白佛言世尊如是如是如佛所

說如空無異如無相無異如無願無異如如
如無異如法界無異如實際無異如平等無
異如解脫無異如離欲無異爾時文殊師利
白佛言世尊唯願如來護持如是甚深法門
於後末世五百歲時當使此經於閻浮提遍
行流布令諸善男子善女人等咸得聞之文
殊師利作是請時即令三千大千世界一切
音樂不鼓自鳴一切諸樹自然鬱茂一切衆
花咸悉開敷又此三千大千世界六反震動
放大光明遍照三千大千世界奪日月光令
不復現百千億天歡喜踊躍得未曾有住於
虛空雨天花香種種諸花及諸花鬘塗香末

香如雨而下香氣氤馥充滿十方作天樂音
其聲和雅一切咸共叉手合掌同聲稱讚希
有希有竒特法門今此文殊師利大士所說
令我等聞我為福會從生至今再遇閻浮轉
大法輪有諸衆生具足善根然後乃得聞此
深法若諸衆生聞已信行當知是人已曾供
養一切諸佛亦為已得甚深法忍若有衆生
聞此經典不驚不怖不退不沒深心愛樂當
知是人不經二乘善根中來今時文殊師利
白佛言世尊今此竒瑞將無為是法門於未
來世閻浮提中遍行流布任持不滅耶佛言
如是如是向所現瑞唯為是經於閻浮提遍

行流布住持不滅故文殊師利言世尊唯願
世尊更建誠實今此經典從出流行熾然不
滅佛言文殊師利若三解脫門能證涅槃是
誠實者於後末世五百歲時此經法門弘闡
浮提熾然不滅為誠實語文殊師利若苦無
常若空無我是實言者於後末世五百歲時
此經法門弘闡浮提熾然不滅為誠實語文
殊師利言世尊如世尊說無我無人無衆生
無壽命無丈夫無摩奴闍無摩那婆無煩惱
無清淨是實言者於後末世五百歲時此經
法門弘闡浮提熾然不滅是誠實語如世尊
說無生死無涅槃無貪欲無瞋恚無愚癡無

名無色無因無果無有無知無身無身證無
心無心果無念無念處無發無發處無色無
受無想無行無識無眼無色無耳無聲無鼻
無香無舌無味無身無觸無意無法無欲界
無色界無無色界無斷無常如是等法是實
言者於後末世五百歲時此經法門弘闡浮
提熾然不滅是誠實語如世尊說無須陀洹
無須陀洹果無斯陀含無斯陀含果無阿那
含無阿那含果無阿羅漢無阿羅漢諸法無
辟支佛無辟支佛諸法無如來無如來諸法
無證平等無力無畏無智果無聖證無空無
無相無無願無離欲處無得本性無有平等

無有證處無暗無明無縛無解無彼岸無此
岸無中間無念無覺如此等法是實言者於
後末世五百歲時此經法門弘闡浮提遍行
流布熾然不滅是誠實語如世尊說於諸法門
無有衆生信解脫得果相應不相應不合不
散如是等法為實言者於後末世五百歲時
此經法門弘闡浮提遍行流布熾然不滅是
真實語如世尊說過去諸如來應供正遍覺
作如斯說無有一法能令衆生於生死中滅
除煩惱解脫涅槃亦無衆生有法生滅乃至
無有過失無出無動如過去佛所說如是未
來現在所說亦然若此等法是實言者於後

末世五百歲時此經法門弘闡浮提遍行流
布是真實語又如世尊說此法時無有菩薩
得是三昧諸陀羅尼門亦復無彼諸佛所說
語言句義乃至不說一文字句無人聽聞無
人得解無人成佛如此等法是實言者於後
末世五百歲時此經法門弘闡浮提遍行流
布熾然不滅是真實語如世尊說無有戒身
無有三昧無有智慧無有解脫無有解脫知
見如此等法是實言者於後末世五百歲時
此經法門弘闡浮提普宣流布熾然不滅是
真實語如世尊說諸菩薩等不行布施不持
禁戒不修忍辱不發精進不入禪定不得般

若不求菩提不轉諸地不得佛道不得諸力
不得無畏不得諸相不獲諸辯不轉法輪不
度衆生令取正覺如此等法是實言者於後
末世五百歲時此經法門弘闡浮提普宣流
布熾然不滅爲真實語文殊師利宣此誠實
誓時三千大千世界大地六種震動卽時彌
勒菩薩摩訶薩白佛言世尊有何因緣今此
世界如是大動佛告彌勒菩薩言彌勒汝今
不應問如是事所以者何末世衆生鈍根少
信聞不能解墮於疑慢長夜不安於是彌勒
菩薩復白佛言世尊唯願說之世尊若說能
多利益一切世間天人大衆故佛告彌勒如

是經典往管已有七十四億百千那由他諸
佛世尊於此方所稱揚讚說皆因文殊師利
及善任意天子等問答諮論也彌勒菩薩復
白佛言世尊是文殊師利及善任意天子聞
此法門其久近耶佛告彌勒乃往過七阿僧
祇劫有佛世尊号普花最上師子遊步勝功
德聚如來應供正遍覺所是善男子等從彼
佛所初聞此經也說是經時衆中有若干恒
河沙衆生皆發阿耨多羅三藐三菩提心復
倍前數衆生得任不退轉忍復倍前數衆生
遠塵離垢得法眼淨尔時世尊說此經已於
是文殊師利與善任意天子及彼十方諸善

薩眾及彼一切諸天子眾及尊者舍利弗尊者摩訶迦葉諸比丘眾乃至所有天人阿脩羅諸龍鬼神一切眾等聞佛所說皆大歡喜信受奉行

大寶積經卷第一百五

又

張海

梧蒲頂反愧傾對反右下音博遽其去反
逼彼力愆去軌反握於角反乘音執也內靡緬也
也反無氛馥伏正作香氣盛也反下音

